



Minggu, 30 Oktober 2022

**Ogen: Kuan-kuanen 16:8-11**



Bujur I Bas Perbinagaan



**U**ga kin kataken bujur? Bujur e bali ras benar, betul, payo, tuhu ras sidebanna. Bujur e lit ukurena entah sukat-sukatna. Bujur pendalankenta adi enggo sue ras aturen si enggo itetapken. Aturen e pe enggo leben iarihken ras isetujui teman arih. Bujur e banci jadi sada karakter entah kebiasaan nggeluh. Kalak bujur sikap akapna i bas ndahiken dahinna, la mbue turah persolen, janah labo lit si man kebiarenken.

Renungen enda mabai kita gelah nggeluh bujur, subuk bas perukuren, pengerana ras pendahin. Tuhan erngena ate kempak kalak bujur, dinging ipasu-pasuNa alu mereken dame ras mejuah-juah. Salah sada si ikataken man banta e me bujur i bas perbinagaan. Erbinaga enda sada dahin si melala i je njemak sen. Adi sungkun kal isi pusuhta, kerina kal kita perlu sen, janah erpala-pala nge kita uga gelah ndatken sen. Megati lanai si inget kita e anak-anak Dibata tupung i lebe-lebe i icidahken sen si melala. Megati nge si idah entah si nanami pe perbinaga si la bujur i bas timbangan, sitik pe tempa akap terkap. La igejapna si sitik e mahansa la ia mejuah-juah. Wari si pagi lanai kalak reh nukur barang man bana. Bas pendahin si deban pe lit kalak korupsi, erkiteken lalap kurang akapna pemasukenna, lanai idalankenna sue ras aturen. Kalak e banci kataken rangap, biaren ia ngenehen sen asangken ngenehen Tuhan. Tempa sen enggo jadi Dibatana.

Ulin rulih sitik tapi alu bujur asangken rulih mbue tapi nipu. Pendahin si ipasu-pasu Tuhan e me pendahin si bujur. Ieteh Tuhan nge kerina uga pendahinta sekalak-sekalak, ras ieteh Tuhan nge kai si iperluken kita sekalak-sekalak. Si ernalem man Tuhan gejakpenna pemere Tuhan e simpar, cukup guna ngelitken keperluan nggeluh. Adi la bujur sada paksa pagi si nanami me ulihna, e me ndatken ukumen si erbahansa la meriah pusu, mesui ate dinging kelsehen rasa lalap. Kentisik ngenca meriah adi kita la bujur.